

Gajah liar Yeop Jong dari Gerik dipindah ke Terengganu

Abd Razak Mohd Ali

Oktober 17, 2020 16:53 MYT



Kerja pemindahan dilakukan 20 kakitangan dari Pusat Konservasi Gajah kebangsaan (PKGK) Lanchang, Pahang dan PERHILITAN Perak. -Astro AWANI

GERIK: Gajah jantan yang ditangkap di kawasan ladang getah di sempadan Kampung Plang dan Kampung Jong, dekat sini Isnin lalu, berjaya dipindahkan ke Taman Negara di Terengganu hari ini.

Gajah yang diberi nama Yeop Jong itu berusia sekitar 14 tahun dengan berat antara 1,800 dan 2,000 kilogram.

Pengarah Jabatan Hidupan Liar dan Taman Negara (PERHILITAN) Perak, Yusoff Shariff berkata, gajah yang berkeliaran bersendirian itu berjaya ditangkap anggota Unit Tangkapan Gajah Perak (UTGP) hasil maklumat penduduk kampung.

Menurutnya, berdasarkan siasatan, gajah itu dipercayai terpisah daripada kumpulan di Hutan Simpan Gerik yang menjadi kawasan rayanya sebelum berkeliaran untuk mencari kumpulan semula.

“Kehadiran gajah itu menakutkan penduduk untuk ke ladang getah mereka, selain ia merosakkan tanaman seperti getah, kelapa, tebu dan durian. Gajah itu juga masuk hingga ke dalam kampung dan menghampiri rumah-rumah penduduk,” katanya di sini.

Yusoff berkata, gajah itu dikenal pasti daripada ID Kumpulan Belum yang dianggarkan sekitar 40 ke 50 ekor yang digelar gajah konflik kerana sering mengganggu beberapa kawasan termasuk Felda Bersia, Kampung Pecah Batu, Bongor dan Jalan Raya Timur Barat.

"Gajah ini merupakan gajah kedua ditangkap oleh UTGP di kawasan ini. Gajah pertama ditangkap pada 2019 dan telah dipindahkan ke Pusat Perlindungan Gajah, Terengganu," ujarnya.

Kerja-kerja pemindahan hari ini dilakukan 20 kakitangan dari Pusat Konservasi Gajah kebangsaan (PKGK) Lanchang, Pahang dan PERHILITAN Perak dengan khidmat dua gajah denak bernama Rambai dan Alam.

Proses pemindahan yang bermula jam 10 pagi selesai jam 2 petang, turut disaksikan oleh Ahli Dewan Undangan Negeri (ADUN) Temenggor, Salbiah Mohamed dan penduduk kampung.

Sementara itu, katanya kehadiran orang ramai yang menyaksikan proses pemindahan adalah perkara biasa dan mereka juga mematuhi prosedur operasi standard (SOP) seperti memakai pelitup muka dan penjarakan fizikal.